

49.

DEO OPTIMO MAXIMO UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,*

QUOD LIBETARIIS DISPUTATIONIBUS;

*manè discutienda in Scholis Medicorum, die Jovis vigesima-secundâ
Decembris, anno Domini M. DCC. LXXIV.*

M. LUDOVICO DES BOIS DE ROCHEFORT, Equite;

Doctore Medico, Præfide.

Sunt ne habiliores ad Artem Medicam, qui Imaginatione præpollent?



MEDICINA ars traditionis est, scriptis & verbo propagata. Rationi & experientiæ insitit. Experientia, rerum ante gestarum memoria stat, & complectitur quidquid observatione circa sanitatem & morbos, & utrisque apta præsidia ab antiquo collectum est Ratio, judicium est, quo, ex pensatis quæcumque pensanda sunt, determinatur quid pro conservandâ, quid pro restituendâ sanitate agendum sit omit-tendumve. Utraque firmis argumentis sit innixa necesse est. Auxilium quodvis adhibere, temerarium est, nisi concurrentibus omnibus deprehendatur illius opportunitas. Pro experientiâ habere obscuras quasdam observationes, multiplici successu non satis firmatas, id certè periculi plenum. Falleretur qui unius sui judicio semper crederet. Curta foret vel senioris experientia, si is alia non nosset quàm quæ ipse expertus est. Experientia Medica, non unius hominis, non unius societatis, non unius seculi, sed omnium, quotquot ab antiquissimo ævo existerunt, Medicorum, imò & quandòque reliquorum hominum, opus est. Ab observatione fluunt, quæcumque de sanitatis & morborum phænomenis cognoscuntur. Prægressas evidentes morborum causas monstravit observatio: horum accidentia, periodos, & finitiones docuit: indicavit unde & variis morbi inter se, & varia ejusdem morbi tempora dignoscerentur: quicquid conservandæ & restituendæ sanitati conducibile est, undequaque desumfit & coacervavit. His cognitionibus ad medendum uti, rationis munus est. His instructa, audet agere, quæ secus prætimiditate remaneret iners. Sic, nisi observatum fuisset plures morbos vomitu & alvi fluxu sanatos, nunquam ratio sola emeticorum purgantiumque medicamentum metum excussisset. Nunquam pariter ausi fuissent Medici, etiam detectâ sanguinis circulatione, ex incisâ venis fundere sanguinem; nisi observatione constitisset prius, spontaneum sanguinis profluvium ægris compluribus saluti fuisse. Sic ratio, ex imitatione Naturæ, sanandi adinvenit leges, atque ad ejus genium totam concinnavit Medicinæ artem. Medicus ergo Naturæ minister est, iners dum agit ipsa, nisi sit auxiliandum; dum ipsa jubet, paratus exsequi. Mutus verò est Naturæ sermo: nutu loquitur & signis. Nisi sedulitate magnâ, non capitur quid velit. Atque etiam intellecta jussa, sine multâ circumspectione maximâ quæ prudentiâ, rectè facere nemo potest.

* Propugnata, anno 1736.

VOCEM autem Naturæ non melius cognoverit is, qui ejus interiora voluerit scrutari. *Intellexi*, inquit Sapiens, *quoddam omnium operum Dei nullam possit homo invenire rationem, eorum quæ sunt sub Sole: & quânto plûs laboraverit ad quærendum, tantò minus inveniat.* Naturam igitur non possumus cognoscere prout in se est, sed tantum, prout se habet ad nos. Illud verò hominibus necessarium non esse constat, quod Deus illos latere voluit. Sufficit itaque Medico, rerum perfectos habere effectus: essentias si posset assequi, fortè suæ artis immensitatis foret impar. Satis quippe jam & longè fructuosioris operæ impendendum, in pernoscentis iis, quæ ad Medicinam verè necessaria sunt. Quæ de sanitate, morbis, remediis, potestatibus, memoriæ tradita sunt, animo tenere; inter agendum, occurrentia quæque proprio Marte studiosè notare; observationes suas inter se, & cum aliorum observationibus conferre; omnibus demum maturè perpensis, inferre quid factò opus sit, quid non; id verè est Medici munus. Huic porrò muneri rectè adimplendo, sunt, præsens memoria, assidua observatio, judicium sagax. Artis præcepta memoria sufficit, his judicium aptat quæcunque patescit observatio, atque ex hac comparatione elicit quid sit agendum. Oportet itaque fidelis sit memoria, completa observatio, judicium maturum. Tria hæc concurrant necesse est. Sed solius est judicii, duo priora regere & moderari. Nisi ad judicii normam composita sit memoria, vix quicquam suggeret tempestivè. Nisi observationi præsit judicium, manca hæc evadet & imperfecta. In Medico itaque maxima requiritur firmitas judicii, exquisitiorque prudentia; quâ, non timidum, sed consideratus sit: (quantum & sæpiùs præstaret timidum esse quàm audacem) quâ attentus ad omnia, singula expendat: quâ nihil inconsulto molitur; à traditione non recedat; novi nunquam avidus, remediis non satis exploratis timeat uti: quâ demum, quum res est obscurior, totum potius Naturæ committat, nisi id ipsum sit inutile, & præstet remedium anceps experiri quàm nullum. Quicquid ergo ad eò necessariæ in Medico prudentiæ obflare deprehenditur, illud ad artis exercitium minimè conducere planum est.

II.

VIS illa, quâ mens rerum percipit imagines, imaginatio dicitur. Hæc qui præpollent cæteris, arrepto quovis objecto fortius percelluntur. Hinc, de iis quæ plenè intuerentur, rectius quidem judicarent; verum hinc etiam fit, ut iudicio, præcipiti rapiantur in errorem: quippe ex iis rebus impelluntur & statuunt, quibus vix alii commoverentur. Id enim habet vividus imaginationis impetus: potenter afficitur intellectus, & voluntatem in consensum trahit. Ad hæc, mens hæc ratione altius acta, excogitatis semel pertinaciter adhæret. Inde, difficile est, ut, qui sunt hujusmodi servidâ imaginatione, in errorem lapsi, erigantur. Inde est etiam, quòd aliorum placita despiciant libenter, suis superbiunt quàm facillimè. Ut autem præ cæteris hominibus splendidiore effingunt sibi rerum imagines, ita in iisdem rebus longius quàm illi vident; atque ex primis suis conceptibus, in alios inde subsequentes latè diffunduntur. Utile quidem foret istud veritatis indagationi, si modò satis nossent rerum omnes & singulos respectus attendere. Sed rapido imaginationis cursu abrepti, quia nesciunt immorari, veritatem præterlabuntur, & ab eâ magis ac magis declinant; atque suis ipsi priores præcipitiis judicii decepti, alios quâdam velut contagii labe afflare consueverunt: affectus siquidem commovere docti, pollent persuadendi arte. Nempe, quæ quique altiori mente concepit, de iisdem vehementius disserit, hominibusque inculcat potentius. Ex his colligere licet, talem imaginationem, si suavis artibus utilis esse possit, inutilem profectò esse, imò damnosam, in veritatis inquisitione. Qui fieri enim posset, ut istiusmodi imaginatio, rectumque ac maturum judicium, in unâ sede morarentur? Qualia autem ferrentur judicia, ubi, ex imperfectâ veritatis indagatione, malè certis fundamentis superstruerentur?

MAGNAM imaginationis vim, & requisitam in Medico prudentiam, stare simul non posse, haud ægrè fatebitur, qui considerare voluerit, quid prudentia postulet Medicum, quid eundem cogeret fortis imaginatio. Prudentiæ est, Naturam indefessè observare & studiosissimè consecrari: in causâ foret acris imaginatio, ut, iis perculsus Medicus quæ primo intuitu detexisset, vel quæ primâ vice fuisset expertus, observationes negligeret pluries repetere, alias aliis vel corrigere vel confirmare; unde, & ignoraret plurima, quæ nonnisi longâ assiduitateprehenduntur, & plurima pro constantibus haberet, quæ varietatibus obnoxia iterato examine cognovisset. Jubet prudentia, ut ea quæ ab aliis observata sunt & propoſita, Medicus sedulò meditetur, senioribus auscultet, horum consilia & animo teneat, & fideli imitatione prosequatur: sed quicumque imaginatione pollerent, sibi tantum credentes, aliorum sententiâ capere, multò magis probare & sequi, dedignarentur. Requirit prudentia, ut Medicus ea contentus inquirere & addiscere, quæ ad artem verè utilia sunt, vanis speculationibus tempus hominum salutis debitum non concedat; sed eorum qui servidâ essent imaginatione, irrequieta mens, amaret altè sapere; necessarias sed obvias cognitiones parvi pendens, secretiora Naturæ mysteria, quæ non posset reterege, divinare gessiret; omniumque aggrediretur explicationes, vana systemata, *suppositionibus*, id est, nullis prorsus fundamentis, suffulta theorias, fluxas & instabiles. Exigit prudentia, ut Medicus ex iis judicet, quæ sensuum ministerio cognoscit: sed ii quorum animus imaginationis vi plus satis obtemperaret, æquè vividas exhiberent sibi rerum abscentium imagines, ac alii præsentium, sic in animum inducerent videre se quæ neutiquam viderent. Denique, vetat prudentia, ne quid in artis exercitio novitatis amor det Medicus, ne quid ex levioribus momentis capiat consilii, neve in deliberando aliquoties animi pendere crubescat: sed enim, imaginatione qui præpollerent, ipsi novitatum essent amatores; rerum facies primâ specie apprehendere consueti, non deliberarent, sed pronunciant; neque ex his quæ observare fortè contigisset sua dicerent judiciâ, sed potius occurrentia quæque semel conceptis aptarent opinionibus. Quot ergo confecerentur noxæ, si, qui sic à Naturâ comparati sunt, faciendam susciperent Medicinam! Observationibus inhabiles, falsas sibi haberent aut imperfectas: præcipites in iudicando, inconsideratè agerent, præstarentque se in exhibendis remediis intempestivè audaces: suæ doctrinæ admiratores, contentiores alienæ, quicquid non credidissent ipsi, illicò damnarent; quæ sibi arrisissent, obstinatè retinerent: & quod perniciosius esset, summâ suâ dicendi facilitate ac potestate persuadendi, alios non rarò suos traherent in errores. Felicem verò ægrum, si fortè primâ accessione benè cogitavissent!

V.

DE Medicinâ igitur non rectè sentit, in suo *Ingeniorum seratinio*, Jo. Huarte, qui homines vividiori imaginatione pollentes, ad hujus artis exercitium habiliores esse opinatus est. Ista mentis facultas, quum prævalet, reliquas deprimit. Sanè, si languida esset nimis, frigeret animus & ignaviâ torperet. Oportet itaque, ut imaginatio suppetat Medico quantum satis sit. Ratione temperata, valde proficua est. Huic quandiu subjacet, judiciorum non præpedit maturitatem, & consequenter, sumum relinquit prudentiæ locum. Quicumque ergo iustâ hâc imaginationis mediocritate donati, accedunt ad artem Medicam, ii sunt reverâ huic arti longè aptissimi: qui nempe, quum & observandi patientiâ simul & delegendi sagacitate excellent, constant judicio & valent prudentiâ. Hujusmodi sunt Hippocrates. Senex ille, quem divinum jure appellavit antiquitas, de rebus naturalibus simplicius quàm subtilius differens, nunquam rationem ab observatioe sejunxit. Solus verè amans, si quas delibavit opiniones, ab illis nunquam detentus fuit. Plurimus in observando, quicquid experientia mon-

4

frare videbatur, tradidit, à posteris revivendum; & , si quid peccaret, emendandum. Neque suos illum errores fateri puduit, neque fuit unquam suæ sententiæ tenax: & , quæ in variis illius operibus sibi discrepare deprehenduntur, innuunt, gnarum illum fuisse retractare quæ jam dixerat, ut in melius immutaret. Patet ex his, summum virum, non imaginationis vi, sed exquisitissimo iudicio, in mendendi arte præcelluisse, quam usque adeò auxit & amplificavit. Eadem fuerunt dotes eximiorum virorum, quos ars Medica præclaros tulit. Eæ lem quoque sint necesse est illius, quicumque ad Medicinam appellit animum. Quum autem vulgò non reperiantur in iis, qui plurimâ imaginatione pollent; stent ii à Medicinâ procul. Ii, & Picturæ, & Poësi, & Musicæ allaborent, ii & orent causas melius; sed abstineant à disciplinâ, in quâ imaginatio non regere sed regi debet, & cujus exercitium consummationis prudentiæ opus est.

Non ergo habiliores sunt ad artem Medicam, qui Imaginatione præpollent.

DOMINI DOCTORES DISPUTATURI.

*M. Natalis - Nicolaus
MALLET.*

*M. Marinus - Jacobus -
Clarus ROBERT.*

*M. Josephus - Marid -
Franciscus LASSONÆ,
Regis in Sacro Consif-
torio Consiliarius, S.
Delphinæ Medicus Pri-
marius, Censor Regius
& Regiæ Scientiarum
Academiæ, necnon Re-
gii Medicorum Nan-
ceianorum Collegii So-
cius.*

*M. Franciscus-Ludovicus
D'ONGLE'E.*

*M. Maximilianus - Jose-
phus LEYS, Rei Her-
bariæ Professor desi-
gnatus.*

*M. Julianus BUSSON,
Nosocomiorum Regio-
rum in Britannia Ins-
pector, & Serenissimæ
Comitissæ Atrebatum,
Medicus Primarius.*

M. Guillelmus FUME'E.

*M. Joannes DESCOMET,
Censor Regius.*

*M. Petrus BERCHER,
Regiæ Hispaniarum
Infantis, dum viveret,
necnon Regii exerci-
tûs ad Infirmitum Rhe-
num in ultimo bello
Medicus primarius*

Proponebat Parisiis AUGUSTINUS THOURET, Lexoviensis, Doctor Medicus
Cadomenfis, Saluberrimæ Facultatis Medicinæ Parisiensis Baccalaureus.
A. R. S. H. 1774, à sextâ ad Meridiem.

Typis QUILLAU, Saluberrimæ Facultatis Medicinæ Typographi.